

դիտողի ստորակայութիւնը, այլ նաեւ՝ նրանց անմարդավայել վիճակին մատնելով, ինքն իր համար դիւրացնում էր միւս քայլը՝ սպանել այդ մարդկային յատկանիշներից պարպուած, տխտղծ արարածին:

Հայոց Յեղասպանութեան պատմութեան, գրականութեան եւ յուշագրութեան մէջ շատ են վկայութիւնները կանանց եւ աղջիկների դէմ կատարուած այստեսակ ոճիրների մասին... Իսկ տղամարդի՞կ: Գրականութիւնը լռում կամ հպանցիկ ակնարկով է անցնում դրանց վրայից: Սանդէշ Սիվաքումարան, որ նախկին Հարաւսլաւիայի առճակատումների ընթացքում տղամարդկանց վրայ կատարուած սեռային չարչարանքներն է ուսումնասիրել, հաստատում է, թէ սեռային այդ քստմնելի արարքներին ենթարկուած տղամարդը իր տղամարդկութիւնը, իր արժանապատիւ ինքնութիւնը պահելու սիրոյն, չէր կարող խոստովանել: Հենրի Մորգենթաուն նկարագրելով թուրք ոճրագործների ի գործ դրած չարչարանքի միջոցները, մանաւանդ՝ տղամարդկանց վրայ եւ մանաւանդ բանտերում, խոստովանում է թէ ինքը չի կարող ամէն ինչ գրել քանի որ դրանք յարմար չեն ամերիկեան մամուլում տպագրուելու համար: Դա իննսուն տարի առաջուայ բարոյական օրինաչափութիւնն էր, որ սակայն ջնջուել է Էդգար Հիլզենրաթի մօտ եւ «Վերջին մտքի հեքեաթը» վէպում իր ամենացնցիչ արտայայտութիւնն է գտել հերոսի սեռային օրգանների վրայ կատարուած բանտային քստմնելի չարչարանքների տեսարաններում:

Այն ինչ որ նկարագրուած կամ ակնարկուած է Հայոց Յեղասպանութեան գրականութեան մէջ, լիովին համապատասխանում է միջազգային շրջանակներում ընդունուած յատուկ գեկոյց-բնութագրումին: Դա խօսում է ժողովուրդ-